



CATHOLIC BISHOPS CONFERENCE of Papua New Guinea and Solomon Islands

P.O. Box 398, Waigani, NCD, Papua New Guinea * Phone: (675) 325 9577 * Fax: (675) 323 2551 *

25th September, 2020

Ol Katolik le manmeri: Stap Holi, kisim skul long hat na tingting, na go bilong mekim wok bilong helpim ol arapela.

Pastoral leta bilong ol Katolik Bisop bilong PNG na SI ,long namba 3 yia bilong ol Le Manmeri

Dia ol Katolik le manmeri bilong Papua Niugini na Solomon Ailan,

Mipela, ol Katolik Bisop bilong Papua Niugini na Solomon Ailan (PNGSI) i laik tok amamas long yupela olgeta long nem bilong Jisas Krais!

Mipela i raitim dispela pas long yupela, ol le manmeri, na dispela em i namba 3 pas mipela i salim long yupela long 3-pela yia mipela i bin makim bilong tingting long ol le manmeri. Namba wan Pastoral pas mipela i bin raitim long yia 2019, na hettok bilong em i olsem "**God i singautim ol manmeri long kamap holi**". Namba tu Pastoral pas mipela i bin raitim long yia 2020, na hettok bilong em i olsem: "**Ol Katolik le manmeri: stap holi na kisim skul long hat na tingting, bilong mekim wok misin**". Nau, long dispela nupela pas mipela i laik strongim wok bilong yupela insait long Sios, na mipela i laik askim yupela long wok wantaim mipela bilong inapim wok misin bilong Sios. Olsem na hettok bilong dispela pas em i olsem: "**Ol Katolik le manmeri: stap holi, kisim skul long hat na tingting, na go bilong mekim wok bilong helpim ol arapela.**"

Dispela Pastoral leta i laik bihainim hettok bilong dispela yia 2021, olsem na mipela ol Bisop i laik toktok long 3-pela samting:

- 1) Ol le manmeri i stap holi;**
- 2) Ol le manmeri i kisim skul long hat na tingting (formesen);**
- 3) Ol le manmeri i go na mekim wok bilong helpim ol arapela.**

1) Ol le manmeri i stap holi: God i laik bai yumi olgeta i kamap santu. Pasin bilong kamap santu em i no wapelam samting bilong sampela man o meri insait long Sios tasol. Nogat. Olgeta manmeri i mas kamap santu. Olgeta de bilong laip bilong yumi, yumi mas wokabaut aninit long grasia bilong God. Santu Pol i tokim Timoti olsem: "*God i bin kisim bek yumi na singautim yumi bai yumi stap manmeri bilong em yet. Em i no ting long gutpela pasin yumi mekim na em i singautim yumi. Nogat. Bipo tru, taim God i no mekim wanpela samting i kamap yet, em i singautim yumi long laik bilong em yet, na long han bilong Krais Jisas em i marimari long yumi na i mekim yumi i kamap manmeri bilong em yet.*" (2 Tim 1:9) Dispela pasin bilong kamap santu i save kamap long taim yumi pas tru wantaim Jisas husat i dai na kirap bek bilong kisim bek yumi. Olsem na sapos yumi kisim na holim dispela strongpela pawa bilong kirap bek bilong em, orait yumi inapim dispela tok bilong Santu Pol: "*Holi Spirit em i givim laip*

long yumi, olsem na yumi mas larim Holi Spirit i stiam olgeta wokabaut bilong yumi.”
(Gal 5:25)

Olsem na long kamap suntu yumi mas bihainim ol dispela samting:

1.1. Personal prea: Mipela i laik askim na strongim yupela long mekim prea olgeta de. Na sapos yupela i bisi tumas, orait 15-pela minit tasol bai inap. Pasin bilong mekim prea i save kamap na i bihainim pasin bilong bung wantaim Jisas. Yumi ken painim Jisas long Tok bilong em long Buk Baibel. Em bai gutpela sapos yupela i ritim na pulim tingting long ol rit bilong Santu Misa bilong wan wan de, na bihainim Tok bilong God long laip bilong yupela.

1.2. Prea wantaim famili: Plant samting olsem TV, internet, mobail fon, i wok long paulim tingting bilong planti manmeri insait long famili, olsem na ol i wok long lusim tingting long God na tingim tumas long ol samting bilong dispela graun tasol. Yumi save tok olsem: sapos famili i prea wantaim, orait ol bai i sindaun gut na i stap wantaim. Olsem na mipela i laik strongim spiritual laip bilong yupela na askim ol Katolik famili long bihainim pasin bilong famili prea olsem:

- a) Beten Korona
- b) Ritim long Buk Baibel ol rit bilong Santu Misa bilong wan wan de
- c) Papa o mama o sampela bikpela man o meri insait long famili i ken givim sotpela skul bilong strongim ol memba bilong famili long bihainim ol samting ol i bin harim long rit bilong Buk Baibel.
- d) Mekim sampela pre long laik na tingting bilong yupela bilong helpim famili.

1.3. Pre wantaim komuniti: Taim yumi pre wantaim ol arapela manmeri, yumi kisim bikpela strong bilong wokabaut long gutpela rot na kamap holi. Bipo tru, long taim ol Aposel i stap yet na Katolik Sios i liklik yet, ol Kristen i save bung na beten wantaim. “*Ol manmeri i strong long harim tok bilong ol aposel, na long helpim ol brata, na long kam bung na kaikai wantaim, na long beten.*” (Aposel 2:42) Olsem na yupela ol le manmeri i ken bung wantaim olgeta wok long ritim na serim Tok bilong God. Wanpela rot long mekim olsem em i pasin bilong biahinim sevenpela step o mak bilong serim Tok bilong God long Baibel. Pasin bilong stap na pre wantaim, em i taim yumi mekim wok bilong evanjelaisesen.

2) Ol le manmeri i kisim skul long hat na tingting (formesen): Jisas yet i bin skulim ol disaipel bilong em inap long 3-pela yia, na bihain long dispela formesen, em i salim ol i go long olgeta hap bilong graun. Olsem na yumi ol Katolik manmeri tu i mas gro long save bilong yumi, long spiritual na sosel formesen. Yumi gat nid long gro long olgeta samting long sait bilong formesen bilong yumi. Long pas mipela i bin raitim bipo long yia 2019, mipela i bin serim sampela tingting long sait bilong edukesen na formesen long ol le manmeri bilong PNGSI.

2.1. Ol pikinini na ol yut: Mipela ol Bisop bilong PNGSI i luksave olsem ol pikinini i mas gro long Katolik bilip bilong ol. Olgeta pikinini i gat namba, na ol i gro long kamap bihain lida na strong bilong Sios na bilong sosaiti. Yumi mas wok hat bilong skulim long ol pikinini long ol gutpela samting bilong spiritual laip na tu olgeta valiu bilong sosaiti. Olsem na mipela i laik askim ol famili long wok hat na salim ol pikinini bilong yupela long Sande Skul, na tu long ol Katolik Skul bilong mipela. Ol

pikinini tu i ken joinim dispela grup ol i kolim “Wok Misin bilong Ol Pikinini” (*Missionary Childhood*), bai ol i kisim gutpela save na stia long laip bilong.

Long wankain pasin, ol yut bilong mipela, olsem ol Katolik sumatin long skul o ol Katolik yut long peris, i nidim bikpela helpim long kisim skul long hat na tingting bilong ol long strongim bilip. Olsem na mipela i laik askim ol peris pris na ol lida insait long peris long bung wantaim bilong givim skul bilong bilip long ol yut bilong yumi.

2.2. Ol le Tisa bilong Bilip: Plant Katolik manmeri i kisim skul bilong bilip long Sande Misa tasol. Yupela, ol le manmeri i hangre nau long kisim planti spiritual kaikai moa yet. Yupela i redi long lusim drink “susu” na kisim ol “strongpela kaikai”, olsem Santu Pol i tok (1 Kor 3:2). Olsem na mipela i laik strongim ol le manmeri long stadi na kisim moa save long skul bilong bilip bilong Katolik Sios na bilong spiritual laip, bai yupela i tu ken helpim formesen insait long ol Liklik Kristen Komuniti, na long Semineri we ol man i kisim skul bilong kamap pater.

3) Ol le manmeri i go bilong mekim wok bilong helpim ol arapela: Long Nupela Testamen, dispela tok “salim i go” i kamap 129 taim. Jisas yet i bin salim ol 12-pela Aposel i go, “*Yupela i mas i go long olgeta hap bilong graun na autim gutnius long olgeta man.*” (Mak 16:15) Dispela wok bilong autim Gutnius em i no samting bilong ol bisop, ol pris, ol relijis na ol katekis tasol. Nogat tru. Em i wok bilong olgeta Katolik manmeri i kisim baptais pinis. Papa Santu, Pop namba 6 i tok klia olsem: „Katolik Sios i stap bilong mekim wok evanjelaisesen.” (*Evangelii Nuntiandi, Desemba 8, 1975*)

3.1. Yupela i mas go bilong helpim ol arapela: Katolik Sios long Papua Niugini na Solomon Ailan i go pas long lukautim edukesen, helt na kain kain wok marimari. Ol le manmeri i gat wok long inapim tu na tep pat long ol dispela sevis, moa yet long helpim ol tarangu na ol manmeri i stap autsait long komyuniti na sosaiti. (Luk 4:18).

3.2. Yupela i mas go bilong mekim wok aposel: Ol le manmeri i pawa na save long mekim planti samting bilong bringim Gutnius long olgeta hap bilong graun. Yumi ken tenkim God bikos long PNGSI i gat planti kain kain grup i save skruim dispela wok i go. Em ol grup olsem: Lijen bilong Maria, Divain Mersi, Korona grup, Karismatik, ol Katolik Meri na ol Katolik Man, ol Katolik profesionel, Antiok Yut, Katolik Yut na planti moa!

Pop Fransis i tok long pasin bilong le manmeri olsem: “Ol i save kamapim planti nupela samting long Sios na mekim em i naispela tru. Ol i kirapim strong na spirit bilong sios bilong mekim wok evanjelaisesen long olgeta hap na ples.” (*Evangelii Gaudium*) Tasol em tu i singautim ol le manmeri long taitim bun moa moa yet long taim em i tok olsem: “Ol le manmeri i makim bikpela namba stret namel long olgeta manmeri bilong God. I gat planti gutpela le manmeri, tasol yet namba bilong ol i no inap long husat i gat strongpela tingting bilong helpim komyuniti, kirapim wok marimari, lainim katekismo na helpim lotu. Tasol maski namba bilong ol le manmeri i wok long kain kain ministri i bikpela, yet dispela wok bilong ol i no save kamap ples klia na Kristen valiu i no go insait long sosaiti na politiks na pasin bilong ples. Sampela taim dispela wok bilong bihainim Gutnius i stap tasol insait long Sios, na i no mekim


wok long senisim ples na sosaiti. Olsem na fomesen bilong ol le manmeri na wok evanjelaisesen i kamap olsem pastoral salens. (*Evangelii Gaudium* 102)

3.3. Nupela Evanjelaisesen: Santu Pop Jon Pol II i bin singautim yumi long mekim Nupela Evanjelaisesen wantaim “paia bilong God, nupela rot bilong mekim wok aposel, na nupela we bilong autim Gutnius” (Mas 9, 1983). Dispela em i sinagut bilong Katolik Sios long kamapim wok bilong “Nupela Evanjelisesen” insait long PNGSI. Yupela ol le manmeri, i mas kamap olsem lam i givim lait long ol manmeri bilong ples yupela i stap long en. Katolik manmeri i mas kamapim senis. Olsem na mipela i laik putim salens long yupela, bai yupela i go pas long dauinim: pasin bilong maritim planti meri - poligami, pasin tambaran na pasin sanguma, korapsen, pait long ples na pait insait long famili, kranki wantok pasin insait long ples na komuyuniti na gavman. Nupela Evanjelisesen i singautim yumi long kamapim gutpela sindaun wantaim strongpela bilip na gutpela laip. Yumi yet i mas kamapim senis!

Pop Fransis i mekim wanpela tok na dispela tok i fit gut tru long Papua Niugini na Solomon Ailan: “Yumi mas wok hat long mekim wok evanjelaisesen insait long kalsa bai kalsa i painim ples insait long Gutnius. Dispela i min olsem, yumi mas helpim, strongim na stremt ol gutpela samting i stap pinis na yumi holim.... Yumi luksave pinis long ol samting nogut i stap long kalsa, na Gutnius i mas helpim yumi long stremt, olsem: pasin bilong man i bosim meri na i ting meri em i samting nating, pasin bilong dring na spak, pasin bilong pait insait long famili, pasin bilong lusim lotu na Santu Misa, pasin tambaran na pasin sanguma na olgeta narapaela pasin nogut.” (*Evangelii Gaudium* 69)

Dispela pas i kam long yupela long taim bilong sik COVID-19. Dispela sik i mekim planti manmeri i pret nogut tru. Em i paulim na bagarapim tingting bilong planti manmeri na planti i bin dai long olgeta hap bilong graun. Dispela sik Covid-19 i kam olsem traipela na strongpela win na i sakim bot bilong yumi. Tasol yumi no ken pret, long wanem Jisas i stap long bot wantaim yumi. Na Jisas bai i mekim win i dai, na wara bai i no mekim nais liklik moa. (Mk 4:35-41). Long helpim bilong Mama Maria na Bleset Pita To Rot yumi mas prea long God na askim em long sambai long yumi.

God i ken blesim yumi long dispela yia bilong ol le manmeri,



+Arsbisop Anton Bal,
Presiden bilong CBC PNGSI.

25th September, 2020